

Akuerineqarani radiup frekvensiinik atuinissaq pillugu aamma radiulerinermi misilitsittarnerit kalerrisaarutillu il. il. pillugit Kalaallit Nunaannut nalunaarut

Radiup frekvensii pillugit inatsisip Kalaallit Nunaanni atuutilersinneqarnissaanik peqqussummi nr. 38, 23. januar 2004-meersumi § 3, imm. 2, § 7, §§ 13-14, §§ 20-21 aamma § 40, imm. 2, naapertorlugit aalajangersarneqarput:

Atuuffii

§ 1. Nalunaarut makku pillugit aalajangersaavoq;

- 1) akuerineqarani radiup frekvensiinik atuinissaq,
- 2) radioqarfinni, tigooraaginnarfittut aaqqissuussaasuni, radiup frekvensiinik atuinissaq,
- 3) umiarsuit radioqarfiini aamma soqutigisaralugu radioqarfinni kiisalu soqutigisaralugu radioqarfinni qaammataasiatigoortitani radiulerinermi misilitsittarnerit allagartallu uppersaatit (certifikater), aamma
- 4) umiarsuarni, timmisartuni aamma soqutigisaralugu radioqarfinni kiisalu soqutigisaralugu radioqarfinni qaammataasiatigoortitani kalerrisaarutinik aamma kiussutsip paasineqarnissaanut normunik tunniussisarneq atuisarnerlu.

Akuerineqarani frekvensinik atuisarneq

§ 2. Radiup frekvensii umiarsuit radioqarfiinut ilanngussaq 1-imi taaneqartutut immikkoortitat umiarsuarni akuerineqarani atorneqarsinnaapput.

Imm. 2. Imm. 1-imi aalajangersagaq atuutissanngilaq radioqarfiit nunamiittut umiarsuit radioqarfiinik attaveqarfiginninneranni frekvensinik atuinissamut.

Imm. 3. Radiup frekvensiinik atuneq, tak. imm. 1, pisassaaq piumasaqaatit killilersuutillu ilanngussaq 1-imi taaneqartut, ilanngullugit certifikatit aamma kalerrisaarutinik kiisalu kiussutsip paasineqarnissaanut normunik atuisarneq pillugit piumasaqaatit, naammassillugit.

§ 3. Radiup frekvensii, timmisartut ilanngussaq 2-mi taaneqartutut radioqarfiinut immikkoortitat, timmisartuni akuerineqarani atorneqarsinnaapput.

Imm. 2. Imm. 1-imi aalajangersagaq atuutissanngilaq radioqarfiit nunamiittut timmisartut radioqarfiinik attaveqarfiginninneranni frekvensinik atuinissamut.

Imm. 3. Radiup frekvensiinik atuneq, tak. imm. 1, pisassaaq piumasaqaatit killilersuutillu ilanngussaq 2-mi taaneqartut, tamatumani aamma certifikatit aamma kalerrisaarutinik kiisalu kiussutsip paasineqarnissaanut normunik atuisarneq pillugit piumasaqaatit, naammassillugit.

§ 4. Radiup frekvensii soqutigisaralugu radioqarfinnut aamma soqutigisaralugu radioqarfinnut qaammataasiatigoortitanut ilanngussaq 3-mi taaneqartutut immikkoortitat akuerineqarani atorneqarsinnaapput.

Imm. 2. Radiup frekvensiinik atuneq, tak. imm. 1, pisassaaq piumasaqaatit killilersuutillu ilanngussaq 3-mi taaneqartut, tamatumani aamma certifikatit aamma kalerrisaarutinik atuisarneq pillugit piumasaqaatit, naammassillugit.

§ 5. Radiup frekvensii sullissinernut §§ 2-4-mi taaneqartuniit allaanerusunut ilanngussaq 4-mi taaneqartutut immikkoortitat akuerineqarani atorneqarsinnaapput.

Imm. 2. Radiup frekvensiinik atuineq, tak. imm. 1, pisassaaq piumasaqaatit killilersuutillu ilanngussaq 4-mi taaneqartut naammassillugit.

§ 6. Kalaallit Nunaanni Namminersorlutik Oqartussat qinnuteqartoqarneratigut akuerisarsinnaavaat atortut, Danmarkiinnaangitsumi aamma nunani allani inatsisinut naapertuuttumik atorneqarsinnaasut aamma frekvensinik atuinissami ilaatinneqarsinnaanissaat.

Umiaarsuarni radiulerinissamut misilitsittarnerit aamma certifikatit

§ 7. Kalaallit Nunaanni Namminersorlutik Oqartussat misilitsinnerit angusiffigineqareernerisigut certifikatinik makkuninnga tunniussaqartassapput:

- 1) GMDSS-mi radiooperatør-itut certifikati nalinginnaasooq (GOC).
- 2) GMDSS-mi radiooperatør-itut certifikati minneq (ROC).
- 3) Angallatit radioqarfiinik MF-, HF- aamma VHF-ikkoortunik atuisinnaanissamut certifikati (LRC).
- 4) Angallatit radioqarfiinik VHF-ikkoortunik atuisinnaanissamut certifikati (SRC).
- 5) Radioqarfinni VHF-ikkoortuni radiotelefonistitut certifikati minneq (BEG).

Imm. 2. Imm. 1-imi taaneqartutut misilitsinnerit misilitsinnissamullu piumasaqaatit imarisaat ilanngussaq 5-imi allassimapput.

§ 8. Allagartaq GOC-certifikat, tak. § 7, imm. 1, nr. 1, pissarsiariniarlugu misilitsinneq pisassaaq allattariarsornertut oqaluttariarsornertullu sulinerimik misiliinertalittut. Qinnuteqartoq Kalaallit Nunaanni Namminersorlutik Oqartussat pisuni immikkut ittuni allattariarsornikkut misilitsinnissamut tulluuttumut utaqqisariaqarsorissanngippassuk misilitsinneq oqaluttariarsornikkut misilitsinnermut uiggiutitut sulinerimik misiliinertalittut ingerlanneqarsinnaavoq.

Imm. 2. Allagartaq ROC-certifikat imaluunniit LRC-certifikat, tak. § 7, imm. 1, nr. 2 aamma 3, pissarsiariniarlugu misilitsinneq oqaluttariarsorluni misilitsinnertut sulinerimik misiliinertalittut ingerlanneqartassaaq.

Imm. 3. Allagartaq SRC-certifikat, tak. § 7, imm. 1, nr. 4, pissarsiariniarlugu misilitsinneq allattariarsornertut misilitsinnerussaaq qinigassatut akissutissanik arlaliusunik naqitanik sammisassartalittut (arlaliusut qinerlerfigisarlugit suliasartalittut).

Imm. 4. Allagartaq BEG-certifikat, tak. § 7, imm. 1, nr. 5, allattariarsornertut misilitsinnerussaaq (arlaliusut qinerlerfigisarlugit suliasartalittut).

Imm. 5. Namminersorlutik Oqartussat pisuni immikkut ittuni allattariarsornikkut nalinginnaasumik misilitsinnissaaq, tak. imm. 1, 3 aamma 4, misilitsittussamut ajornassatillugu imaluunniit ajornartorsiutaarujussuassatillugu, ikiuussinnaapput apeqqutinik atuffassinikkut aamma akissutissanut immersuiffissamik immersuinikkut tamatumani Kalaallit Nunaanni Namminersorlutik Oqartussat misilitsinnerup siunertarisaa tunngavigalugu isumannaatsuusorinninnissaat naapertorlugu.

§ 9. GOC-certifikatit aamma ROC-certifikatit tunniunneqartassapput 18-ileereersunut. LCR-certifikatit 16-ileereersunut tunniunneqartassapput.

Imm. 2. SRC- aamma BEG-certifikatit 16-ileereersunut tunniunneqartassapput.

Imm. 3. Misilitsinnissaaq siusinnerpaamik pisinnaassaaq 18-iliinissaaq imaluunniit 16-iliinissaaq, qaammatinik pingasunik sioqqullugu.

Imm. 4., Nalunaarut manna naapertorlugu certifikatinut europamiut Post- og Telesammenslutningianni (CEPT) ECC-komitep aalajangiineri inassutaalu europamiut ataatsimoorlutik pilersitaannut aamma Kalaallit Nunaata akuerisaanut naapertuuttumik pilersinneqartunut nunat allat certifikatii aalajangiinernut inassutinullu taaneqartunut naapertuuneri oqartussat pilersitsisunit uppersarsaasigaasunut naligiissinneqassapput.

Imm. 5. Nunat allat certifikatii kalaallit umiarsuaanni radiulerinissamut Namminersorlutik Oqartussanit certifikatiliunneqartunut sanilliunneqarsinnaasut Kalaallit Nunaanni Namminersorlutik Oqartussat akuersissutigisarsinnaavaat. Akuersinissamut piumasaqaataavoq radiut pillugit nunat tamat malittarisassiaat certifikatimi malinneqartassasut aamma nunat allat oqartussaasuisa aalajangersagaannut naapertuuttumik atuussinnaassuseqassasut.

§ 10. Certifikatertaarnissamik ilinniartitsineq misilitsinnerlu ilinniartimmi Namminersorlutik Oqartussat akuerisaanni ingerlanneqassaaq.

Imm. 2. Ilinniartit akuerineqarsinnaapput uppersarsarsinnaagunikku

- 1) ilinniartitsisoq suliatigut ilisimasaqartoq piginnaassuseqartorlu minnerpaamik misilitsinnerup uppersarsarnissaanut piumasaqaatinik naammassinninnissamut,
- 2) umiarsuarni radiulerineq pillugu ilinniartitsisoq suliatigut naleqquttunik piginnaasaqartoq,
- 3) ilinniartitsitaanerup atorneqarsinnaaneranut periarfissanik ilinniartitsisoq ilisimasaqartoq aamma
- 4) ilinniartitsinermi atortorissaarutit pisariiallit radiulerinermilu naleqquttut atoriaannaallu pigineqartut, tak. § 12.

Imm. 3. Imm. 2, nr. 2 malillugu akuersisoqarsinnaaqullugu misilitsinnissap tungaanut atuartitsinerup ingerlarnga pillugu atuarfik aammattaaq naatsumik nassuiaassiusaaq.

Imm. 4. Atuartitsinerup ingerlarnga pillugu nassuiaammik Namminersorlutik Oqartussat itisileeqqosisinnaapput, tak. imm. 3.

Imm. 5. Namminersorlutik Oqartussat allakkatigut innersuussutannik atuarfik malinninngippat atuarfiup akuersissutaanik Namminersorlutik Oqartussat arsaarinnissinnaapput, tak. imm. 2.

§ 11. Ilinniartitaaneq akuerineqarsinnaassappat minnerpaamik GOC pillugu 3 ECTS pointinut (European Credit Transfer System), LRC pillugu 2 ECTS pointinut aamma ROC pillugu 1 ECTS pointinut naapertuuttumik sivisussuseqassaaq.

§ 12. Atuartitsinermut aamma suliatigut misilitsinnissamut atugassatut umiarsuit radiui certifikatinut pineqartumut ullumikkut naleqquttut atoriaannaallu pigineqassapput.

Imm. 2. Ajornartoornermi radiut naleqqatut aallakaatitsissutit (EPIRB) aamma radartransponder (SART) tassaasinnaapput “atorneqarsinnaagallartutut” taaneqartartut.

Imm. 3. Atortut qaammataasiakkoortittakkat eqqarsaatigalugit taamaallaat piumasaqaataavoq umiarsuarni atortut Inmarsat-C ullumikkut naleqquttut atoriaannaallu pigineqassasut.

Imm. 4. Atortut pillugit piumasaqaatini ilaanngunneqanngillat atortut SSAS (Ship Security Alert System) aamma LRIT (Long-Range Identification and Tracking of ships).

§ 13. Ilinniartitaanerni ilinniartitsisut ataatsimut isigalugit soraarummeerutaasartunit qaffasinnerusunik piginnaasaqassapput. Tamanna imatut paasineqassaaq perorsaanikkut piginnaasat, atuagarsornikkut suliatigullu aamma/imaluunniit inuussutissarsiuutigisinnaasatut uppersarsaasikkat saniatigut piukkunnassuseqarnissaq.

§ 14. Misilitsinnissamik qinnuteqaat ilanngussivigisaasassaaq assimik passinut assitaliunneqartartut ittumik tunniunneqartassaarlu Kalaallit Nunaanni Namminersornerullutik Oqartussanut.

Imm. 2. Piffissaq sumiiffillu misilitsiffissat aalajangerneqartassapput Namminersornerullutik Oqartussanit.

Imm. 3. Qinnuteqaammut peqatigitillugu nunat tamalaat radiut pillugit malittarisassiaanni isertuussisussaaneq pillugu aalajangersakkamik qinnuteqartup ilisimannereerneranut uppersaaitit nalunaarut atsiorneqartassaaq.

§ 15. Inimut misilitsiffissamut isersinnaatitaanissami misilitseqataasussaq kinaassutsimut uppersaammik (passi, biilersinnaanermut allagartaq assigisaalluunniit) atuussinnaasumik takutitsisassaaq.

Imm. 2. Suliatigut misilitsinnerni allagartartaarumasup qularnaagassaraa misilitsinnerup naammassineqarnissaanut radioqarfinnik ullutsinnut naapertuuttunik ingerlanneqarnissamullu piareeqqasunik atugassaqaartitsisoqarnissaa Kalaallit Nunaanni Namminersorlutik Oqartussat erseqqinnerusumik inassutigisaat malillugit.

Imm. 3. Oqaluttariarsornikkut suliatigullu misilitsinnerit tamanut ammatitaassapput. Taamaattorli censori soraarummeersitsisorlu piginnaatitaassapput tusarnaartut amerlassusaannik killiliinissamut tamanna pisariaqarsorinassappat.

§ 16. Soraarummeersitsisoq aamma Kalaallit Nunaanni Namminersorlutik Oqartussat censoritut toqqagaat misilitsiffiussapput.

Imm. 2. Misilitsinnerni “Angusivoq” aamma “Angusingilaq” karakteritut atorveqassapput. Naliliisuussaaq censori Kalaallit Nunaanni Namminersorlutik Oqartussanit toqqagaq. Soraarummeersitsisoq naliliiniarnermi peqataasassaaq. Naliliinissaq isumaqatigiinngissutaatillugu censorip naliliinera inissutaasumik aalajangiisuusassaaq.

Imm. 3. Soraarummeersitsisoq censorilu suliatigut ilisimasaqartuussapput piginnaaneqassappullu minnerpaamik piunasaqaatinut misilitsinnermi naammassineqartut uppersaasuussanut naapertuuttumik.

§ 17. GOC-certifikati, tak. § 7, imm. 1, nr. 1, tunniunneqarsinnaassaaq misilitsinnerup angusiffigereerneraniit ullormiit suliarineqarfianiit naatsorsorlugu ukiut 5 tikillugit atuuffissalikkatut.

Imm. 2. GOC-certifikatimik piginnittut, imm. 1 malillugu atuussinnaatitaaffia naaersumik, qinnuteqarnikkut LRC-certifikatimik tunineqarsinnaassapput. LRC-certifikatimik piginnittut ROC-certifikatimik piginnittuusutut naatsorsuunneqartassapput.

Imm. 3. GOC-certifikatip suli ukiuni 5-ini atuussinnaangorlugu nutarternissaani piunasaqaataasassaaq piginnittup uppersassagaa

- 1) umiarsuarmi avataasiortumi GMDSS-imi radiooperatøritut certifikatimik taama ittumik peqarfiusussami ukiut 5-it qaangiuttut ingerlaneranni sivikinnerpaamik ukiumi ataatsimi sulereersimalluni,
- 2) umiarsuarmi avataasiortumi GMDSS-imi radiooperatøritut certifikatimik taama ittumik peqarfiusussami qaammatit 6-it ingerlaneranni sivikinnerpaamik qaammatini 3-ni sulereersimalluni, imaluunniit
- 3) sulereersimalluni, Kalaallit Nunaanni Namminersorlutik Oqartussat pisuni ataasiakkaani naliliiffiginninnerat malillugu nr. 1-imi imaluunniit 2-mi sulisimanissatut piunasaqaataasunut nallersuuttut akuersissutigineqarsinnaasumik.

Imm. 4. GOC-certifikatip suli ukiuni 5-ini atuuteqqittussatut pissarsiareqqinnissaani inunnut imm. 3-mi piumasaqaatinik naammassinningsunut tunngatillugu piumasarineqartassaaq pineqartup allagartartaaqqinnissaq pillugu oqaluttariarsornikkut aamma suliat ilaannik misilitseqqinnermi angusinnissaa, tak. § 8, imm. 1.

Imm. 5. Allagartartaaqqinnissaq pillugu misilitsinnissamut piumasaqaatit, tak. imm. 4, ilanngussaq 5-imi allassimapput.

Imm. 6. Certifikatit nutarternissaannik qinnuteqarnerni qinnuteqarnermi immersugassaq immikkut ittoq Kalaallit Nunaanni Namminersorlutik Oqartussanit tunniunneqartassaq atorineqassaaq.

Imm. 7. Nutarterinerni certifikati nutaaq tunniunneqartassaaq.

§ 18. ROC- certifikatit ullormit atuutolerfianniit ukiuni 5-ni atuuttussanngortinneqartassapput kingornalu qinnuteqarnikkut ukiunut 5-nut atuuttussanngorlugit nutarterneqarsinnaallutik.

§ 19. LRC-certifikatit killiligaanngitsumik atuuffeqarput.

§ 20. §§ 17-19 apeqqutaatinnagit Kalaallit Nunaanni Namminersorlutik Oqartussat, pissutissalimmik pasitsaakkunikku misilitsinnermi angusimasooq ilisimasassanik allaqqaammut misilitsinnermi piumasaqaataasunik ilisimasaqarunnaartoq, piumasarisinnaavaat allagartallip qaammatit pingasut qaangiutsinnagit nutaamik misilitsinneq angusiffigissagaa.

Imm. 2. Certifikatimik piginnittup, tak. imm. 1, angusiffiginngippagu certifikati Kalaallit Nunaanni Namminersorlutik Oqartussat arsaarinnissutigissavaat.

Umiarsuarni radiulerinermi kalerrisaarutit aamma kiussutsip paasineqarnissaanut normut

§ 21. Kalaallit Nunaanni Namminersorlutik Oqartussat qinnuteqartoqarneratigut kalerrisaarutiniq kiussutsillu paasineqarnissaanut normunik tunniussaqartassapput umiarsuarni Kalaallit Nunaanni nalunaarsukkani imaluunniit radioqarfinni Kalaallit Nunaanni nunamiittuni umiarsuit radioqarfiinik attaveqarfiginninnerni radiup frekvensiinik atuinissamut atugassanik.

§ 22. Umiarsuit Kalaallit Nunaanni nalunaarsukkat radioqarfiini imaluunniit radioqarfinni Kalaallit Nunaanni nunamiittuni frekvensinik atuinissami taamaallaat kalerrisaarut imaluunniit kiussutsip paasineqarnissaanut normu Kalaallit Nunaanni Namminersorlutik Oqartussanit umiarsuarmut imaluunniit radioqarfimmut nunamiittumut tunniunneqarsimasooq atorineqartassaaq. Aammattaaq radioqarfinni nunamiittup aqqa oqaatsimik “radio”-mik malitsilerlugu atorineqartassaaq.

§ 23. Kalaallit Nunaanni Namminersorlutik Oqartussat kalerrisaarummik imaluunniit kiussutsip paasineqarnissaanut normumik tunniunneqareersumik, tak. § 17, arsaarinnissinnaapput kalerrisaarummik imaluunniit kiussutsip paasineqarnissaanut normumik piginnittuusoq akiliutissanik akilerneqartussanngoreersunik, malittarisassat peqqussummi § 37 naapertorlugu aalajangersarneqartut naapertorlugit akilersinniarneqartussanik, akiliinngippat, imaluunniit certifikati Kalaallit Nunaanni Namminersorlutik Oqartussanit § 20, imm. 2, naapertorlugu arsaarinnissutaassappat.

Timmisartut radioqarfiinik atuinissanut misilitsittarnerit allagartallu uppernarsaatit (certifikater)

§ 24. Timmisartut radioqarfii taamaallaat atorneqarsinnaassapput inummit certifikatimik radioqarfimmik taama ittumik atuinissamut atuussinnaasumik piginnittumit, imaluunniit inummit certifikatimik Statens Luftfartsvæsenimit tunniussaasumik piginnittumit alaatsinaanneqartumik.

Imm. 2. Trafikstyrelsen timmisartut radioqarfiini radiunik atuinissaq pillugu certifikatitaarniarluni misilitsinnissat pillugit malittarisassiussaaq.

Imm. 3. Trafikstyrelsen misilitsinnerup angusiffigineqareerneratigut timmisartut radioqarfiini radiunik atuinissamut certifikatinik tunniussisarlungu arsaarinnittuusassaaq.

Timmisartut radioqarfiinik atuinerni kalerrisaarutit aamma kiussutsip paasineqarnissaanut normut

§ 25. Kalaallit Nunaanni Namminersorlutik Oqartussat qinnuteqartoqarneratigut kalerrisaarutinik aamma kiussutsip paasineqarnissaanut normunik timmisartut Kalaallit Nunaanni nalunaarsukkat imaluunniit radioqarfinni Kalaallit Nunaanni nunamiittuni radioqarfinnik atuinerni radiup frekvensiinik atuinissamut atugassanik tunniussisassapput.

§ 26. Timmisartut Kalaallit Nunaanni nalunaarsukkat radioqarfiini imaluunniit radioqarfinni Kalaallit Nunaanni nunamiittuni frekvensinik atuinissamut atugassatut taamaallaat atorneqartariaqarput kalerrisaarut imaluunniit kiussutsip paasineqarnissaanut normut, Kalaallit Nunaanni Namminersorlutik Oqartussanit umiarsuarmut imaluunniit radioqarfimmut nunamiittumut tunniussaasut.

§ 27. Kalaallit Nunaanni Namminersorlutik Oqartussat kalerrisaarummik imaluunniit kiussutsip paasineqarnissaanut normunik, tunniunneqareersunik, tak. § 25, arsaarinnissinnaapput, kalerrisaarutinik imaluunniit kiussutsip paasineqarnissaanut normumik piginnittuusooq akiliutissanik akilerneqartussanngoreersunik, malittarisassat peqqussummi § 37 naapertorlugu aalajangersarneqartut naapertorlugit akilersinniarneqartunik, akiliinngippat.

Soqutigisarlugu radiulerinermi aamma soqutigisarlugu radioqarfinnik qaammataasiatigoortitanik radiulerinermi misilitsittarnerit aamma certifikatit

§ 28. Kalaallit Nunaanni Namminersorlutik Oqartussat soqutigisarlugu radiulerinermi aamma soqutigisarlugu radioqarfinnik qaammataasiatigoortitanik radiulerinermi kategori A-mik, B-mik D-millu certifikatitaartitsinissamut misilitsinnernik ingerlassisassapput.

Imm. 2. Kalaallit Nunaanni Namminersorlutik Oqartussat misilitsinnissat ilanngussaq 6-imi taaneqartut allattariarsornikkut misilitsinnertut ingerlatissavaat.

Imm. 3. Misilitsinnerit aamma misilitsinnissamut piumasaqaatit imarisaat ilanngussaq 6-imi allassimapput.

Imm. 4. Kalaallit Nunaanni Namminersorlutik Oqartussat pisuni immikkut ittuni allattariarsornikkut nalinginnaasumik misilitsinnissaq, tak. imm. 2, misilitsittussamut ajornassatillugu imaluunniit ajornartorsiutaarujussuassatillugu, ikiuussinnaapput apeqqutinik atuffassinikkut aamma akissutissanut immersuiffissamik immersuinikkut tamatumani Kalaallit Nunaanni Namminersorlutik Oqartussat misilitsinnerup siunertarisaa tunngavigalugu isumannaatsuusorinninnissat naapertorlugu.

§ 29. Nunat allat certifikatii CEPT pillugu inassuteqaammut Harmonized Amateur Examination Certificate (HAREC) pillugu T/R 61-02-mut naapertuuttumik tunniussat misilitsinnernik angusiviginninnernut naligiissitaassapput, tak. § 28. Taamatutaaq nunani allani angusiffigisatut misilitsinnerit § 28-mi pineqartutut misilitsinnernut nallersuunneqassapput Kalaallit Nunaanni Namminersorlutik Oqartussanut uppersarneqarpat misilitsinnissamut piumasaqaatit naammassineqartut nunani allani taamatulli misilitsinnermik angusiviginninnikkut.

Imm. 2. Akuersissutit, nunani allani pisortanit tunniussat, sivikitsuinnaasumik Kalaallit Nunaanniinnissami atuussinnaassapput taamatut atuussinnaassuseqarneq nunani allani isumaqatigiissutini Danmarkimit akuersissutigineqartuni allassimassappat.

§ 30. Kalaallit Nunaanni Namminersorlutik Oqartussat soqutigisaralugu radiulerinermi aamma soqutigisaralugu radioqarfinnik qaammataasiatigoortitanik radiulerinermi radiup frekvensiini atuinissamut misilitsinnermik angusisunut certifikatinik Kategori A-nik, B-nik D-nillu tunniussisassapput, tak. § 28, imm. 1 aamma § 29.

Imm. 2. Kalaallit Nunaanni Namminersorlutik Oqartussat inunnut certifikatimik kategori A-miittumik allagartartaartunut HAREC-certifikat-imik (Harmonized Amateur Radio Examination Certificate) CEPT pillugu inassuteqaammut T/R 61-02-mut naapertuuttumik tunniussaqaarsinnaapput.

§ 31. Kinaluunniit certifikatimik piginnittoq aammalu Kalaallit Nunaanni Namminersorlutik Oqartussat naliliinerat malillugu ilisimasassanik allagartalimmit ilisimaneqartariaqartunik ilisimannigunnaartoq misilitseqqissaq.

Imm. 2. Certifikatimik § 30, imm. 1-imi aamma 2-mi taaneqartutut ittumik piginnittup misilitseqqinneq angusiffiginngippagu Kalaallit Nunaanni Namminersorlutik Oqartussat certifikati arsaarinnissutigissavaat.

*Soqutigisaralugu radiulerinermi aamma soqutigisaralugu radioqarfinnik
qaammataasiatigoortitanik radiulerinermi kalerrisaarutit*

§ 32. Kalaallit Nunaanni Namminersorlutik Oqartussat inunnut atuussinnaasunik certifikatilinnut qinnuigineqarneq malillugu kalerrisaarummik nammineq pigisassamik, tamatumani aamma radioqarfinnut inuttaqanngitsunut kalerrisaarummik tunniussisassapput soqutigisaralugu radioqarfinnik aamma soqutigisaralugu radioqarfinnik qaammataasiatigoortitanik atuinerni atugassanik. Kalerrisaarut taamatutaaq tunniunneqarsinnaavoq inunnut inatsisit naapertorlugit allat sinnerlugit ingerlatsisuusunut, atuussinnaasumik certifikatilik, tak. § 30, radiup frekvensiini atuinissamut akisussaassuseqartitaassappat.

Imm. 2. Kalerrisaarummik tunniussaqaarnissamut patsisissaassaaq radiup frekvensiini atuinissap Kalaallit Nunaanni najukkamut frekvensinik nalinginnaasumik atuiffiusussamut attuumassuteqartuunissaa.

Imm. 3. Soqutigisaralugu radiulernermit kalerrisaarummik atugassamik Namminersorlutik Oqartussat tunniussisassapput kalerrisaarutitut ukununga: OX, XP.

§ 33. Soqutigisaralugu radiulerinermut aamma soqutigisaralugu radioqarfinnik qaammataasiatigoortitanik radiulerinermut frekvensinik atuinissami kalerrisaarut Kalaallit Nunaanni Namminersorlutik Oqartussat soqutigisaralugu radiulerinermik sammisalimmut, radioqarfinnut inuttaqanngitsumut imaluunniit allat sinnerlugit inatsisitigut ingerlatsisuusumut tunniussimasaat, tak. § 32, taamaallaat atorineqartariaqarpoq.

Imm. 2. Kinaluunniit nunani allamiut kalerrisaarutaannik kalerrisaarutilik, aammalu nalunaarummi matumani malittarisassat malillugit soqutigisaralugu radiulerinermut aamma soqutigisaralugu radioqarfinnik qaammataasiatigoortitanik radiulerinermut radiup frekvensiinik atuisinnaatitaq Kalaallit Nunaanniikkallarnerni nunani allamiut kalerrisaarutaannik atuisinnaavoq ”OX”-imik aallaqqaasiisarnikkut.

§ 34. Kalaallit Nunaanni Namminersorlutik Oqartussat kalerrisaarummik § 32 naapertorlugu tunniussamik, arsaarinnissinnaapput kalerrisaarummik piginnittuusoq akiliutissanik peqqussummi § 37 naapertorlugu akilersinniarneqartunik akiliinngippat, imaluunniit certifikati § 31, imm. 2, naapertorlugu Kalaallit Nunaanni Namminersorlutik Oqartussanit arsaariinnissutaassappat.

Isertuussisussaaneq

§ 35. Radiukkut kalerrisaarinerit, allanit tiguisussaataitaanngitsunit tiguneqartussat, imarisaat piunerilu atorniarneqassanngillat, tamanut saqqummiunneqassanatik imaluunniit susassaqqanngitsunut ingerlateqqinneqassanatik.

Imm. 2. Isertuussisussaaneq, tak. imm. 1, atuutissanngilaq radiukkut attaveqatigiinnernut, kikkunnit tamanit nalinginnaasumik atugassiaasunut, s. ass. ajutuulerni kalerrisaarinerit, uuttortaanikkut ingerlatsinerni kalerrisaarinerit, soqutigisaralugu radioqarfinnut, radiofoniikkut aamma fjernsynikkut aallakaatitsinerit.

Pisortatigoortumik nalunaarasuaateqarfinnut atassusertinneq tamakkuninnga attaveqarfiginninnissaq siunertaralugu

§ 36. Radiup frekvensii atorneqassanngillat radioqarfiup pisortatigoortumillu nalunaarasuaateqarfimmik atuisunik akornanni imaluunniit radioqarfik aqutigalugu oqaloqatigiissitsinissamut, radiup frekvensii atortunut, pisortatigoortumik nalunaarasuaateqarfimmut atassusertinnissamut naatsorsuussanut, atasumik atorneqassanngippata.

Imm. 2. Kalaallit Nunaanni Namminersorlutik Oqartussat tamanut saqqummiutissavaat atortut suut pisortatigoortumik nalunaarasuaateqarfinnut oqaloqatiginnissinnaanngorluni atassusertinnissamut naatsorsuussaananerat pillugu allattorsimaffik.

Kalaallit Nunaanni Namminersorlutik Oqartussat nakkutilliisuusutut

§ 37. Kalaallit Nunaanni Namminersorlutik Oqartussat inatsimmik taannalu naapertorlugu malittarisassatut patsisissaatitatullu aalajangersakkanik naammassinninnissamut nakkutilliisuusapput.

Pineqaatissiisutissanik aalajangersakkat

§ 38. Akiliisitaanermik pineqaatissinneqassaaq kinaluunniit makkuninnga unioqqutitsisoq:

- 1) Piumasaqaatinik killilersuutinillu ilanngussani 1-4-mi aalajangersarneqartunik.
- 2) Kalerrisaarutininik atuinissaq pillugu malittarisassianik, tak. §§ 22, § 26 aamma 33, imm. 1.
- 3) Pisortatigoortumik nalunaarasuaateqarfinnut oqaloqatiginnissinnaanngorluni atassusertinneq pillugu malittarisassiat, tak. § 35, imm. 1.
- 4) Isertuussisussaaneq pillugu malittarisassiat, tak. § 36.

Imm. 2. Peqqussummik unioqqutitsineq aktielselskabimit, anpartsselskabimit, andelsselskabimit, naalagaaffimmit, Namminersorlutik Oqartussanit, kommunemit imaluunniit

kommunenit peqatigiinnit il. il. (taakku sinnerlugit inatsisitigut ingerlatsisuusunit) unioqqutitsineruppat inatsisitigut ingerlatsisuusq taamatut itsillugu akiliisitsissutissanut akisussaatitaasinnaavoq Kalaallit Nunaanni pinerluttulerinermik inatsit malillugu.

Atortuulersitsineq il. il.

§ 35. Nalunaarut manna atuutilissaaq 1. januar 2013.

Imm. 2. Akuerineqarani radiup frekvensiiniq atuinissaaq pillugu aamma radiulerinermi misilitsittarnerit kalerrisaarutillu il. il. pillugit Kalaallit Nunaannut nalunaarut nr. 1107, 20. september 2010-meersoq atorunnaarsinneqarpoq.

Imm. 3. Nalunaarut manna atuutinneqassaaq certifikatinut, kalerrisaarutitut aamma kiussutsip paasineqarnissaanut normunut malittarisassiat maannamut atuuttut malillugit pissarsiaallutillu angusiffigisamik misilitsinnernut.

Imm. 4. Certifikatit pigineqartut aamma misilitsinnerit malittarisassiat maannamut atuuttut malillugit angusiffigisat atuutiinnassapput.

Imm. 5. Kalerrisaarutit aamma kiussutsip paasineqarnissaanut normut akuersissutitigut, nalunaarutip atortuulersinneqarnera sioqqullugu tunniunneqartutigit pissarsiaasut, atuutiinnassapput.

Erhvervs- og Vækstministeriet, ulloq 3. december 2012

ANETTE VILHELMOSEN

/Jakob Juul